

## 每週經課朗誦經文(巴克禮台語漢字)2013/11/10

### 共同經課 - 1 哈該書一章十五節~二章九節

15 這是佇大利烏王二年六月二十四日。1 七月二十一日，耶和華的話託先知哈該講：2 「你著給猶大的總督撒拉鐵的子所羅巴伯及約撒答的子祭司頭約書亞，以及所剩的百姓，講：3 恁中間猶佇啲的人，有是誰曾看見此間殿從前的榮光嗎？現在恁看了怎樣啊？豈毋是佇恁的目睷看親像無嗎？」4 耶和華講：「所羅巴伯啊，你著勇敢！約撒答的子祭司頭約書亞啊，你亦著勇敢！」耶和華閣講：「此所在的百姓啊，恁亦著勇敢！亦著做工，因為我及恁佇啲。這是萬軍的耶和華講的。5 當恁出埃及的時我及恁立約的話。我的神踏佇恁中間，恁莫得驚。」6 因為萬軍的耶和華按呢講：「閣無佹久，我欲閣一擺振動天、及地、及海，及乾地。7 我欲振動萬國；萬國所欣慕者欲來，我就互榮光充滿此間殿。這是萬軍的耶和華講的。」8 萬軍的耶和華講：「銀是我的，金亦是我的。9 此間殿後來的榮光欲贏過前的榮光；這是萬軍的耶和華講的；閣佇此個所在我欲賞賜平安。這是萬軍的耶和華講的。」

### 共同經課 - 2 詩篇一百四十五篇一節~五節，十七節~二十一節

1 〔大衛謳啲的詩。〕我的上帝我的王啊，我欲尊你做高！我欲永遠謳啲你的名！2 我欲日日祝謝你，亦欲永遠謳啲你的名！3 耶和華至大，應該受大的謳啲；伊的大到袂測度得。4 此代欲對彼代謳啲你的所做，亦欲報揚你大權能的事。5 我欲靜靜想你尊貴榮光的威嚴，及你奇妙的所做。17 耶和華佇伊一切所行的，無毋公義；佇伊一切所做的攏有慈愛。18 凡若求叫耶和華的，耶和華及in親近，就是親近許個誠實求叫伊的。19 敬畏伊的，伊欲成in的心所愛，亦欲聽in的求叫，來拯救in。20 耶和華保護一切疼伊的人，總是一切做歹的人伊欲滅無in。21 我的嘴欲講出謳啲耶和華的話；願見有血氣的攏永遠謳啲伊的聖名。

### 共同經課 - 3 帖撒羅尼迦後書二章一節~五節，十三節~十七節

1 兄弟啊，論到咱的主耶穌基督的臨到，及咱諸個聚集歸伊，阮求恁：無論對神、抑是對話，抑是對批假冒阮的名的，講主的日現在到啦，2 恁的心志莫得快快搖動，也莫得驚惶。3 無論用甚麼法，一概莫得互人引誘；因為彼日猶未到，的確代先有背教的事，及彼個罪惡的人，就是沈淪的人，出現。4 伊是做對敵，也自高，搬(pôa<sup>n</sup>)過一切稱做上帝及受敬拜的，甚至坐佇上帝的殿，表明做上帝。5 我猶及恁佇啲的時，曾將諸個事給恁講，恁豈袂記得嗎？13 若是主所疼的兄弟啊，阮應該替恁常常感謝上帝；因為上帝對起頭揀恁，欲互恁得救，是在佇神的成聖，及信真理。14 為著此個，伊對阮所傳的福音曾召恁，來得著咱的主耶穌基督的榮光。15 所以，兄弟啊，著倚在，恁所得著的傳授，無論是對嘴講的，抑是對阮的批，凡所學習的，著執守伊。16 咱的主耶穌基督及咱的父上帝，就是疼咱、也佇恩典將永遠的安慰及好的向望賞賜咱者，17 願伊安慰恁的心，堅固恁佇一切好的所行好的所講。

### 共同經課 - 4 路加福音二十章二十七節~三十八節

27 有撒都該人就是講人無復活的。幾若個就近來問耶穌講：28 「先生啊！摩西有記來指示阮講：『若有人，伊的兄死有某也無子，伊的小弟著娶伊的某，生子來續接伊的兄。』29 按呢有兄弟七人，大的娶某，無子就死；30 第二個、第三個也娶伊；31 七個攏按呢，無留子就死去。32 後來婦仁人也死。33 按呢，佇復活的時，此個婦仁人欲做in中間叨落一個的某？因為此七人攏有娶伊做某。」34 耶穌給in講：「此世界的人有嫁有娶；35 若是算做會堪得得著彼個世界，也對死人中復活的就無嫁無娶；36 因為也袂會閣死，是親像天使一樣；已經做復活的人，就做上帝的子。37 論死人復活，摩西佇莉帕彼篇有指明，稱呼主做亞伯拉罕的上帝，以撒的上帝，雅各的上帝。38 伊毋是死人的上帝，是活人的上帝；因為眾人為著伊來活。」